

I. DISPOSICIÓNS XERAIS

Presidencia

Lei 1/1993, do 13 de abril, de protección de animais domésticos e salvaxes en cativeidade.

A falta dunha lexislación actualizada e integradora sobre a protección e defensa dos animais que viven no contorno humano, que recolla os principios xerais de respecto, protección e defensa ós seres vivos que conviven ó noso redor, tal como figuran nos convenios e tratados internacionais e na normativa dos países socialmente máis avanzados, determina a oportunidade de aprobar unha lei no ámbito da Comunidade Autónoma de Galicia que teña como obxectivo o seu amparo e salvagarda, adoptando unha postura activa ante conductas que comporten abuso dos animais.

É obxecto desta lei a protección dos animais domésticos e salvaxes que viven en cativeidade, baixo a posesión ou protección do home, recolléndose nela as atencións mínimas que deben recibir os animais, desde o punto de vista hixiénico-sanitario, así como a tenencia, a venda ou o mantemento destes, co fin de garantir uns mínimos de bo trato dos animais, regulándose co dito obxecto a inspección e vixilancia, as obrigas dos seus posuidores, os centros de recollida e albergues ou as instalacións para o seu mantemento temporal.

A presente lei fixa como principio fundamental de protección destes animais o de posesión ou tenencia responsable, de modo que os afectados asuman o coidado dos animais en tódolos aspectos contidos na presente lei como a contraprestación humana que se lles debe fronte ó afecto ou á utilidade que significa o animal para o seu compañeiro ou posuidor.

Excepcionalmente, permite esta lei a celebración dos espectáculos tradicionais nos que interveñan animais sempre que se veñan celebrando consuetudinariamente, baseándose na necesidade e no interese de pervivencia do patrimonio histórico-cultural dos costumes dos distintos lugares de Galicia.

Tamén recolle e incentiva a lei a necesaria participación da sociedade no seu conxunto a través da potenciación das asociacións de protección e defensa e da difusión dun espírito que contribúa ó fomento do respecto ós animais.

O proxecto de lei ten en conta os criterios incluídos na «I Declaración universal dos dereitos do animal», aprobada pola UNESCO e posteriormente pola ONU.

Por todo o exposto, o Parlamento de Galicia aprobou e eu, de conformidade co artigo 13º 2 do Estatuto de Galicia e co artigo 24º da Lei 1/1983, do 23 de febreiro, reguladora da Xunta e do seu Presidente, promulgo, en nome de El-Rei, a Lei de protección de animais domésticos e salvaxes en cativeidade.

TÍTULO I

DISPOSICIÓNS XERAIS

Capítulo I

Ámbito e definicións da lei

Artigo 1º —Ámbito da lei.

A presente lei ten por obxecto establece-las normas para a protección dos animais domésticos e salvaxes en cativeidade no ámbito da Comunidade Autónoma de Galicia. Quedan excluídos aqueles animais que son obxecto dunha regulación específica, como os criados para o aproveitamento das súas producións e os salvaxes.

Artigo 2º —Definicións da lei.

Para os efectos desta lei enténdese por:

1.—Animais domésticos: os que se crían, reproducen e conviven co home e que non son susceptibles de ocupación.

2.—Animais salvaxes en cativeidade: os que sendo libres pola súa condición foron obxecto de captura no seu medio natural, manténdose nun grao absoluto e permanente de dominación.

3.—Animal abandonado: o que circula libremente aínda que estea provisto da correspondente identificación, sexa por placa ou tatuaxe, se no prazo de vinte días a partir da súa captura non é reclamado por ninguén que acredite a súa relación posesoria.

Capítulo II

Das medidas de protección dos animais domésticos e salvaxes en cativeidade

Artigo 3º—Dos establecementos.

Os albergues, clínicas, criadeiros, salóns de peiteado, establecementos de venda, de recollida e de experimentación e os dedicados á exhibición de animais salvaxes en cativeidade, sen prexuízo do esixido nas demais disposicións que lles sexan aplicables, de acordo coa natureza do animal, deberán cumprir os seguintes requisitos:

a) Estar autorizados pola Consellería de Agricultura, Gandería e Montes.

b) Leva-los libros-rexistro nos casos, nas condicións e co contido que regulamentariamente se estableza.

c) Dispoñer de boas condicións hixiénico-sanitarias e de locais adecuados ás condicións fisiolóxicas dos animais que alberguen.

d) Adopta-las medidas necesarias para evita-los contactos entre os animais que alberguen.

e) Dispoñer de servicios veterinarios suficientes e adecuados a cada establecemento.

f) Se é o caso, entrega-los animais coas debidas garantías sanitarias, libres de toda enfermidade, acreditándoo coa documentación que regulamentariamente se estableza.

Artigo 4º —Do transporte dos animais domésticos e salvaxes en cativeidade.

O transporte dos animais obxecto da presente lei deberá efectuarse de acordo coas peculiaridades propias de cada especie; ó mesmo tempo terán que cumprilos requisitos hixiénico-sanitarios esixidos pola normativa específica e aqueloutros que regulamentariamente se determinen.

Artigo 5º —Dos espectáculos.

1.—Prohíbese a utilización de animais en espectáculos, pelexas, festas populares e outras actividades se iso lles pode ocasionar danos, sufrimentos ou facelos obxecto de tratamento antinatural. Excepcionalmente, a Consellería de Agricultura, Gandería e Montes poderá autorizar espectáculos consuetudinarios nos que interveñan animais.

2.—Quedan excluídos do ámbito de aplicación desta lei a festa dos touros, os encerros e demais espectáculos taurinos.

3.—Sen prexuízo do disposto no punto 1, a Consellería de Agricultura, Gandería e Montes poderá autorizar, baixo o control da respectiva federación, a celebración de competicións de tiro de pombiño.

Artigo 6º —Da experimentación.

1.—Toda actividade experimental con animais que poida causarles dor, sufrimento, lesión ou morte adecuarase á súa normativa específica e requirirá, se é o caso, autorización previa da Consellería de Agricultura, Gandería e Montes.

2.—Os animais destinados a experimentos serán obxecto da protección e dos coidados xerais previstos nesta lei.

3.—Os experimentos deberán levarse a cabo baixo a dirección do persoal facultativo correspondente.

4.—Os animais que, como resultado da experimentación, non poidan desenvolver unha vida normal serán sacrificados de forma rápida e indolora.

Artigo 7º —Das obrigas dos posuidores.

1.—Os posuidores dos animais teñen a obriga de tratalos humanitariamente e mantelos en boas condicións hixiénico-sanitarias, de acordo coas características propias da especie, cumprindo o disposto nesta lei e nas súas disposicións regulamentarias.

2.—O posuidor será responsable de adoptar as medidas necesarias para impedir que os animais lixen as vías ou espazos públicos, lles causen molestias ós veciños ou poñan en perigo a quen conviva no seu contorno.

3.—Os posuidores de animais domésticos e salvaxes en cativeidade pertencentes ás especies que regulamentariamente se determinen deberán censalos nos correspondentes servizos provinciais de sanidade en produción animal, no prazo de un mes.

A Consellería de Agricultura, Gandería e Montes poderá establecer a obrigatoriedade de que outras especies de animais de compañía sexan censadas.

4.—O posuidor dun animal, sen prexuízo da responsabilidade subsidiaria do propietario, será responsable dos danos e das perdas que ocasione o mesmo, de acordo coa lexislación aplicable no seu caso.

Capítulo III

Dos animais domésticos

Artigo 8º —Consideracións xerais.

1.—O posuidor dun animal doméstico é responsable da súa protección e coidado así como do cumprimento de tódalas obrigas contidas nesta lei.

2.—Os órganos competentes da Administración autonómica desenvolverán programas de educación no coidado e na protección de animais e prestaranlles asesoramento ós particulares e ás entidades que o soliciten.

Artigo 9º —Medidas sanitarias.

1.—A Consellería de Agricultura, Gandería e Montes no ámbito das súas competencias, poderá ordenar a vacinación ou o tratamento obrigatorio dos animais domésticos.

2.—Naqueles casos nos que, por razón da sanidade animal ou saúde pública, se esixa o sacrificio obrigatorio, este efectuarase de forma rápida, indolora e nos locais aptos para ese fin baixo a responsabilidade e o control dun veterinario.

3.—Os concellos e a Consellería de Agricultura, Gandería e Montes poderán ordenar o illamento e internamento dos animais domésticos no caso de que se lles diagnosticasen enfermidades transmisibles, co obxecto de sometelos ó tratamento curativo ou, cando non fose posible, proceder ó seu sacrificio, tal como se indica no punto anterior.

Capítulo IV

Dos animais salvaxes en cativeidade

Artigo 10º —Medidas xerais.

1.—O posuidor dun animal salvaxe en cativeidade é responsable da súa protección e coidado, así como do cumprimento de tódalas obrigas contidas nesta lei.

2.—A tenencia de animais salvaxes en cativeidade procedentes de importación, no ámbito territorial da Comunidade Autónoma de Galicia, precisará informe previo da Consellería de Agricultura, Gandería e Montes relativo ás condicións hixiénico-sanitarias do animal.

3.—Prohíbese a tenencia de animais salvaxes perigosos para o home fóra dos locais autorizados pola Consellería de Agricultura, Gandería e Montes, así como a súa circulación por lugares abertos ó público sen as medidas protectoras que se establezan, de acordo coas características de cada especie.

4.—Os animais salvaxes en cativeiro serán aplicables as medidas sanitarias previstas no artigo 9º desta lei.

Capítulo V

Dos animais abandonados

Artigo 11º —Da recollida.

1.—Os concellos recollerán os animais abandonados e reteranos ata que sexan reclamados, acollidos ou sacrificados.

2.—Se o animal non está identificado reterase por un prazo de vinte días, transcorrido o cal os centros de recollida poderán darlle o destino máis conveniente, e só en último termo o sacrificio.

3.—Se o animal está identificado avisarase o propietario, quen dispoñerá dun prazo de dez días para recuperalo, unha vez aboados os gastos orixinados polo seu mantemento. Unha vez transcorrido este prazo, se o propietario non satisfíxese o aboamento dos gastos, o centro de recollida procederá de acordo co disposto no punto anterior.

Artigo 12º —Do servizo de recollida.

1.—Para o cumprimento do disposto no artigo anterior as administracións locais poderán concertar convenios de cooperación ou colaboración coa Consellería de Agricultura, Gandería e Montes, con asociacións de protección e defensa dos animais ou con outras entidades autorizadas para ese fin.

2.—Se o servizo non se encontra municipalizado e unha ou varias asociacións de protección e defensa dos animais solicitan a súa xestión, o Concello poderá concedela por un prazo mínimo de tres anos prorrogables.

3.—Sen prexuízo do disposto nos demais preceptos desta lei que lle sexan aplicables, os establecementos dedicados á recollida de animais abandonados deberán estar inscritos no rexistro creado para tal efecto pola Consellería de Agricultura, Gandería e Montes.

4.—As normas mínimas de funcionamento dos servizos de recollida estableceranse regulamentariamente.

TÍTULO II

DAS ASOCIACIÓNS DE PROTECCIÓN E DEFENSA DOS ANIMAIS

Artigo 13º —Definición e condicións.

1.—Para os efectos desta lei son asociacións de protección e defensa dos animais aquelas que se constitúen legalmente, sen fin de lucro, que teñen por obxecto

to fundamental a defensa e protección dos animais no medio no que viven, sendo consideradas de utilidade pública e benéfico-docentes.

2.—As asociacións definidas no punto anterior inscribíranse nun rexistro creado para tal efecto pola Consellería de Agricultura, Gandería e Montes e poderán ser declaradas por ela entidades colaboradoras cando reúnan os requisitos esixidos polas disposicións regulamentarias dictadas con tal fin.

3.—A Consellería de Agricultura, Gandería e Montes poderá establecer dentro dos seus presupostos programas de axuda ás asociacións que teñan a condición de entidades colaboradoras.

4.—As asociacións teñen a obriga de denuncia-los feitos que consideren infracción, de acordo co previsto nesta lei.

TÍTULO III

DA ADMINISTRACIÓN DE DEFENSA DOS ANIMAIS

Artigo 14º —Principio xeral.

Tódalas administracións públicas no territorio de Galicia deberán cooperar no desenvolvemento das medidas de defensa e protección dos animais e na denuncia ante os órganos competentes de calquera actuación contraria ó disposto nesta lei.

Artigo 15º —Órganos da comunidade.

O órgano da Xunta de Galicia competente en materia de defensa e protección dos animais de compañía e salvaxes en cativeiro será a Consellería de Agricultura, Gandería e Montes.

Artigo 16º —Órganos das corporacións locais.

Compételle ó alcalde a responsabilidade superior na defensa e protección dos animais no ámbito de cada municipio. As funcións obrigatorias que lles corresponden ós concellos son as establecidas na normativa de réxime local e as contidas con carácter xeral para tódalas administracións públicas na presente lei.

TÍTULO IV

DA INSPECCIÓN E VIXILANCIA

Artigo 17º —Da inspección e vixilancia.

1.—A inspección superior para o mellor cumprimento do establecido na presente lei correspóndelle á Xunta de Galicia a través da Consellería de Agricultura, Gandería e Montes.

2.—Sen prexuízo do disposto no punto anterior, tódolos órganos da Administración da Comunidade que por razón das súas funcións teñan relación co contido da presente lei teñen a obriga de vixialo seu cumprimento.

3.—Os facultativos dependentes da Consellería de Agricultura, Gandería e Montes rexistrarán tódalas actuacións en materia de policía sanitaria na área xeográfica da súa competencia.

4.—Así mesmo, os veterinarios en exercicio, as clínicas e os hospitais veterinarios arquivarán as fichas clínicas dos animais obxecto de vacinación, tratamento ou sacrificio obrigatorio e poñeranas ó dispor da autoridade competente.

5.—O servizo de censo, vixilancia e inspección poderá ser obxecto dunha taxa fiscal.

TÍTULO V

DAS INFRACCIÓNS E SANCIONES

Capítulo I

Das infraccións

Artigo 18º

1.—Para os efectos da presente lei será infracción administrativa o incumprimento das obrigas, das prohibicións e dos requisitos establecidos nela, así como o das condicións impostas nas autorizacións administrativas outorgadas ó seu amparo.

2.—A responsabilidade administrativa será esixible sen prexuízo da que puidese corresponder no ámbito civil ou penal.

3.—No caso de celebración de espectáculos prohibidos, incorrerán en infracción administrativa non só os seus organizadores senón tamén os donos dos locais ou terreos que os cedesen, a título oneroso ou gratuito.

Artigo 19º

As infraccións clasifícanse en leves, graves e moi graves.

Artigo 20º —Infraccións leves.

Son infraccións leves:

- a) O maltrato dos animais que non lles cause dor.
- b) A venda, donazón ou cesión de animais a menores de 14 anos ou incapacitados, sen autorización de quen teña a súa patria potestade, tutela ou custodia.
- c) A donazón de animais de compañía como premio.
- d) Non mante-lo animal en boas condicións hixiénico-sanitarias.
- e) Mantelos en instalacións inadecuadas.
- f) Non facilitár-lle-la alimentación adecuada ás súas necesidades.
- g) A utilización de animais en traballos que os imobilicen, causándolles dor.
- h) Exerce-la venda ambulante de animais fóra dos mercados e feiras autorizados.
- i) A carencia ou tenencia incompleta do arquivo de fichas clínicas dos animais obxecto de tratamento obrigatorio ou vacinación.
- j) A posesión dun can non censado conforme o previsto no artigo 7º 3 desta lei.

k) O sacrificio de animais en lugares públicos.

l) A non recollida inmediata dos excrementos evacuados por un animal de compañía na vía pública.

m) Calquera outra actuación que vulnere o disposto nesta lei e que non estea tipificada como infracción grave ou moi grave.

Artigo 21º —Infraccións graves.

1.—Serán infraccións graves:

- a) O maltrato dos animais que lles cause dor ou lesións.
- b) Mutilalos sen necesidade ou sen o adecuado control veterinario.
- c) Abandonalos.
- d) A venda ambulante, reiterada, de animais en xeral, fóra dos establecementos, feiras e mercados legalmente autorizados.
- e) A venda de animais salvaxes en cativeiro fóra dos establecementos autorizados.
- f) O incumprimento das obrigas sinaladas nos artigos 3º, 4º e 5º desta lei, salvo o disposto no artigo 22º 1.b).
- g) A subministración de estimulantes non autorizados ou substancias que poidan atentarse contra a súa saúde, excepto cando sexa por prescripción facultativa.
- h) A non vacinación ou o non tratamento obrigatorio dos animais.
- i) A venda de animais enfermos, salvo que se trate dun vicio oculto, non coñecido polo vendedor.
- j) A cría ou comercialización de animais sen cumprilos requisitos correspondentes.
- k) A tenencia de animais perigosos sen as medidas de protección que se fixen.
- l) O incumprimento de calquera outra das condicións impostas nas autorizacións administrativas.

2.—Considerarase, así mesmo, como infracción grave a reincidencia en infracción leve, entendendo que existe tal reincidencia cando se comete unha infracción leve do mesmo tipo cá que motivou unha sanción anterior no prazo de trescentos sesenta e cinco días seguintes á notificación desta; requirirase que a resolución sancionadora adquirise firmeza.

Artigo 22º —Infraccións moi graves.

1.—Son infraccións moi graves:

- a) O maltrato dos animais que lles cause a morte.
- b) A organización e celebración de espectáculos, pelexas ou outras actividades con animais que impliquen crueldade ou maltrato ou poidan ocasionarlles sufrimentos.
- c) A venda de animais con enfermidade infecto-contaxiosa coñecida.

d) A venda de animais para experimentación sen a debida autorización ou a centros non autorizados.

e) A esterilización ou o sacrificio de animais sen control facultativo.

f) A reiteración en faltas graves.

2.—Considerarase, así mesmo, como infracción moi grave a reincidencia en infracción grave, entendendo que existe tal reincidencia cando se comete unha infracción grave do mesmo tipo cá que motivou unha sanción anterior no prazo de trescentos sesenta e cinco días seguintes á notificación desta; requirirase que a resolución sancionadora adquirise firmeza.

Artigo 23º —Prescrición das infraccións.

As infraccións leves prescribirán ós seis meses, as graves ós doce meses e as moi graves ós dous anos.

Capítulo II

Das sancións

Artigo 24º —Das sancións pecuniarias.

1.—As infraccións indicadas no capítulo anterior serán sancionadas con multas de:

- a) As leves, de 5.000 a 50.000 pesetas.
- b) As graves, de 50.001 a 500.000 pesetas.
- c) As moi graves, de 500.001 a 2.500.000 pesetas.

2.—A imposición das sancións previstas corresponderalles a:

- a) O alcalde do concello, para as infraccións leves.
- b) O director xeral de Producción Agropecuaria e Industrias Agroalimentarias, para as infraccións graves.
- c) O conselleiro de Agricultura, Gandería e Montes, para as moi graves.

3.—A incoación dos expedientes sancionadores, dos cales a tramitación se adecuará ó disposto na Lei de réxime xurídico das administracións públicas e do procedemento administrativo común, corresponderalles ós delegados da Consellería de Agricultura, Gandería e Montes.

4.—Regulamentariamente determinaranse os supostos nos que a incoación e tramitación poidan serlles encomendadas ós concellos.

Artigo 25º —Das sancións non pecuniarias.

Na resolución do expediente sancionador, ademais das multas a que se refire o artigo anterior, os órganos competentes poderán impoñer as seguintes sancións:

1.—O peche temporal ou definitivo, respectivamente para as infraccións graves ou moi graves, dos establecementos regulados por esta lei.

2.—A prohibición temporal ou permanente, respectivamente para as infraccións graves e moi graves, do exercicio de actividades comerciais reguladas pola lei.

3.—A incautación dos animais obxecto de actividades ilegais ou de abandono para calquera tipo de infracción.

4.—No caso de federacións ou de calquera outra entidade non lucrativa, para infraccións graves ou moi graves, poderase suspender temporalmente, ou en casos moi graves definitivamente, o exercicio das súas actividades.

Artigo 26º —Graduación das sancións.

A imposición das sancións prescritas pola lei graduarase conforme os seguintes criterios:

1.—A transcendencia social ou sanitaria e o prexuízo causado pola infracción.

2.—O ánimo de lucro e a contía do beneficio obtido na comisión da infracción.

3.—A importancia do dano causado ó animal.

4.—A reiteración ou reincidencia na comisión de infraccións.

Disposicións adicionais

Primeira.—Autorízase a Xunta de Galicia para o desenvolvemento regulamentario da presente lei.

Segunda.—A Administración autónoma dispoñerá as medidas oportunas para a creación dun órgano específico de asesoramento para o mellor cumprimento do preceptuado na presente lei, en especial no referente á vixilancia, inspección e sanción das infraccións tipificadas nela.

Terceira.—Autorízase o Consello da Xunta de Galicia para a actualización por decreto das sancións pecuniarias establecidas na presente lei.

Disposición transitoria

No prazo de un ano a partir da posta en vigor da lei, os establecementos regulados por ela deberán adoptar as medidas necesarias para axustarse ós seus preceptos.

Disposición derradeira

A presente lei entrará en vigor o día seguinte ó da súa publicación.

Santiago de Compostela, 13 de abril de 1993.

Manuel Fraga Iribarne
Presidente

Lei 2/1993, do 15 de abril, pola que se aproba unha disposición adicional á Lei 12/1992, do 9 de novembro, de creación de determinadas escalas de persoal funcionario ó servizo da Xunta de Galicia.

A Lei de escalas da Comunidade Autónoma de Galicia non recolleu no texto aprobado polo Parlamento de Galicia unha disposición adicional que regulase a integración nas escalas da dita lei dos funcionarios que prestan os seus servizos na Administración autonómica.